

Annáll efnahags- og peningamála

Júní 2005

Hinn 3. júní var tilkynnt að bankastjórn Seðlabanka Íslands hefði ákveðið að hækka stýrivexti bankans, þ.e. vexti í endurhverfum viðskiptum við lánastofnanir, um 0,50 prósentur í 9,50% hinn 7. júní. Vextir á innstæðubréfum til einnar viku voru ákveðnir 0,15 prósentum undir stýrivöxtunum og fjárhæðartakmarkanir í vikulegum útboðum þeirra voru afnumdar. Aðrir vextir bankans hækkuðu hinn 11. júní, vextir á viðskiptareikningum lánastofnana í bankanum um 0,75 prósentur og daglánavextir bankans um 0,25 prósentur.

Hinn 15. júní tilkynnti Íslandsbanki hf. að gengið hefði verið frá útgáfu vikjandi skuldabréfa að fjárhæð 150 milljónir evra, eða um 12 milljarða króna. Skuldabréfin teljast til eiginfjárpáttar A í samræmi við reglur um viðbótareiginfjárliði.

Júlí 2005

Hinn 11. júlí tilkynnti Kaupþing banki hf. að öll skilyrði tilboðs Kaupthing Holdings UK Ltd., dótturfélags hans í Bretlandi í Singer & Friedlander Group PLC., hefðu verið uppfyllt. Í kjölfarið var stefnt að afskráningu hluta í Singer & Friedlander. Nam tilboðsupphæðin 316 pensum á hlut eða sem svarar til um 547 milljóna punda, um 64,6 ma.kr., fyrir alla útgefna hluti í Singer & Friedlander. Mælti stjórn Singer & Friedlander með kaupunum. Kaupþing banki átti fyrir viðskiptin 19,5% hlutafjár í Singer & Friedlander.

Hinn 12. júlí tilkynnti Seðlabanki Íslands um árlega endurskoðun gengisskráningarvogar krónunnar í ljósi utanríkisviðskipta ársins 2004. Hin nýja vog tók gildi sama dag (sjá meðfylgjandi töflu).

Hinn 19. júlí staðfesti alþjóðlega matsfyrirtækið Moody's Investor Service lánshæfiseinkunnir ríkissjóðs Íslands, Aaa fyrir langtímaskuld-

Ný gengisskráningarvog 2005 (%)

Byggð á viðskiptum 2004

Lönd	Mynt	Út- flutn- ingsvog	Inn- flutn- ingsvog	Gengis- skrán- ingavog	Breyting frá fyrri vog
Bandaríkin	USD	22,03	24,02	23,03	1,19
Bretland	GBP	14,66	9,55	12,10	0,21
Kanada	CAD	1,27	0,94	1,10	0,04
Danmörk	DKK	7,67	8,59	8,13	-0,28
Noregur	NOK	5,02	7,05	6,04	0,13
Svíþjóð	SEK	2,11	5,64	3,87	0,19
Sviss	CHF	1,50	0,92	1,21	-0,18
Evrusvæði	EUR	42,67	39,60	41,14	-1,23
Japan	JPY	3,07	3,69	3,38	-0,07
Alls		100,00	100,00	100,00	0,00
Norður-Ameríka		23,30	24,96	24,13	1,23
Evrópa		73,63	71,35	72,49	-1,16
Evrópusambandið		67,11	63,38	65,24	-1,11
Japan		3,07	3,69	3,38	-0,07

Heimild: Seðlabanki Íslands.

bindingar og P-1 fyrir skammtímaskuldbindingar. Einkunnirnar gilda bæði fyrir erlendar og innlendar skuldbindingar. Horfur eru áfram stöðugar.

Ágúst 2005

Hinn 3. ágúst staðfesti alþjóðlega matsfyrirtækið Fitch Ratings óbreyttar lánshæfiseinkunnir fyrir Landsbanka Íslands hf., A fyrir langtímaskuldbindingar, F1 fyrir skammtímaskuldbindingar, C í eigin einkunn og 2 í stuðningseinkunn. Horfur um breytingar á matinu eru stöðugar.

Hinn 4. ágúst staðfesti alþjóðlega matsfyrirtækið Fitch Ratings lánshæfiseinkunnir ríkissjóðs Íslands, AA- fyrir langtímaskuldbindingar í erlendri mynt, AAA fyrir langtímaskuldbindingar í íslenskum krónum og F1+ fyrir skammtímaskuldbindingar í erlendri mynt. Horfur eru áfram stöðugar.

Hinn 5. ágúst var 98,8% hlutur ríkisins í Landssíma Íslands hf. seldur Skipti ehf. Að Skipti ehf. standa átta aðilar, Exista ehf. með 45% hlut, Kaupþing banki með 30%, Lífeyrissjóður verslunarmanna með 8,25%, Gildi-lífeyrissjóður með 8,25%, Sameinaði lífeyrissjóðurinn með 2,25%, Samvinnulífeyrissjóðurinn með 2,25%, MP fjárfestingarbanki með 2% og Imis ehf. með 2%. Greiðslu kaupverðsins, 66,7 ma.kr. skyldi miða við gengisskráningu Seðlabanka Íslands 27. júlí 2005. Kaupverðið skiptist í eftirfarandi gjaldmiðla: íslenskar krónur: 34.505.550.000, evrur: 310.000.000 og Bandaríkjadali: 125.000.000. Nýjum eigendum er skylt að uppfylla skilyrði ríkisins er fram koma í söluskilmálum. Þannig má enginn einn einstakur aðili, skyldir eða tengdir aðilar, eignast stærri hlut í Símanum en 45% fram að skráningu félagsins á Aðallista í Kauphöll, og ekki minna en 30% af heildarhlutafé félagsins verður af hálfu kaupanda, að bjóða almenningi og öðrum fjárfestum til kaups í síðasta lagi fyrir árslok 2007. Fyrir sama tíma skal félagið skráð á Aðallista Kauphallarinnar. Eftir þessi viðskipti hefur ríkið dregið sig að öllu leyti út úr samkeppnisrekstri á fjarskiptamarkaði.

Hinn 12. ágúst staðfesti alþjóðlega matsfyrirtækið Moody's Investor Service óbreyttar lánshæfiseinkunnir fyrir Landsbanka Íslands hf., A2 fyrir langtímaskuldbindingar, P-1 fyrir skammtímaskuldbindingar og C fyrir fjárhagslegan styrkleika. Horfur um breytingar á matinu eru stöðugar.

Hinn 17. ágúst var umsókn Lánasjóðs sveitarfélaga um starfsleyfi sem lánafyrirtæki samþykkt af Fjármálaeftirlitinu.

September 2005

Hinn 6. september barst ríkissjóði greiðsla fyrir hlut hans í Landssíma Íslands hf. frá Skipti ehf. að fjárhæð 66,7 ma.kr. Þeim 32,2 ma.kr. sem greiddir voru í erlendri mynt verður varið til að greiða niður erlendar skuldir ríkissjóðs. Afgangur söluandvirðisins verður að mestu lagður inn á reikning í Seðlabankanum og verður til ráðstöfunar á árunum 2007-2010. Þeim hluta greiðslunnar sem greiddur verður í íslenskri mynt mun verða varið á eftirfarandi hátt: 15 ma.kr. verður varið á árunum

2007 - 2010 til framkvæmda í vegamálum, 18 ma.kr. á árunum 2008 - 2012 verður varið til uppbyggingar hátæknisjúkrahúss, 3 ma.kr. til kaupa á varðskipi og flugvél fyrir Landhelgisgæsluna, 2,5 ma.kr. til eflingar nýsköpunar í íslensku efnahagslífi, 2,5 ma.kr. í fjarskiptasjóð, 1 ma.kr. í framkvæmdir vegna geðfatlaðra, og 1 ma.kr. til nýbyggingar fyrir Stofnun íslenskra fræða – Árnastofnun.

Hinn 8. september var tilkynnt að Seðlabankinn myndi auka regluleg gjaldeyriskaup sín á innlendum millibankamarkaði fyrir ríkissjóð. Í ljósi bættrar greiðslustöðu ríkissjóðs hefur fjármálaráðherra ákveðið að greiða meira af erlendum lánum ríkissjóðs en áður var áformað. Frá 12. september munu kaup bankans hækka um 10 milljónir Bandaríkjadala í viku hverri til viðbótar þeim 2,5 milljónum dala sem hann hefur keypt vikulega það sem af er ári.